

dia, mas punnad en me seruir et guardar en esa çibdat de Murçia et en esa tierra mio seruicio et de me fazer saber los fechos commo alla pasaren. Et quanto yo aqui aya librado muchas cosas que tengo de librar en Seuilla, que son mio seruicio, yo librare lo de Pedro Lopez en aquella manera que mas mio seruicio sea et asi commo a el et a uos cunple et uos enbiare mandar commo fagades sobrello.

Dada en Seuilla, X dias de agosto, era de mill et trezientos et sesenta et çinco annos. Yo, Pedro Ruyz, de la camara, la fiz escreuir por mandado del rey.

### XCV

**1327-IX-26, Sevilla. Provisión real de Alfonso XI al concejo de Murcia, ratificando su carta 1327-VI-9, Sevilla, por la que recibía bajo su protección a don Haym, judío de Murcia, pues el portador de la carta la había extraviado por el camino. (A.M.M. Arm. 1, Lib. 43, f. 14r).**

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo et a los alcalles et al alguazil de la çibdat de Murçia, salut et graçia.

Sepades que yo vos enbie mi carta en que vos enbie mandar que guardasedes et anparasedes al rabi don Haym, fijo de don Simuel, de y, de Murçia, et que non consintiesedes a ninguno que le fiziese fuerça nin tuerto, nin agrauamiento nin otro mal ninguno. Et, agora, don Mose, nuestro fisico, primo del dicho rabi, dixome que le dixeran que el omne que leuaua la carta que la perdio en el camino. Et pediome merçed que vos enbiase otra mi carta en esta razon, et yo touelo por bien.

Porque vos mando, vista esta mi carta, que guardedes et anparedes et defendades al dicho rabi don Haym et non consintades a ninguno que le faga fuerça nin tuerto nin otro mal ninguno, ca sabet que por el debdo que el ha con don Mose et don Simuel, mis fisicos, tengo por bien que el et todos los suyos sean guardados et anparados con derecho.

Et non fagades ende al por ninguna manera, so pena de la mi merçet. La carta leyda, datgela.

Dada en Seuilla, veynte et seys dias de setiembre, era de mill CCC LX Vº annos. Yo, Velasco Perez de Medina, la fiz escreuir por mandado del rey.

